

Porti

Di u portu in sussuru
anima à tempu nata
a luce ti pigliò
per insignà a strada
Un trattu si pisò
l'idea d'un viaghju
chì tandu principiò...

U mondu, u mare
l'altrò
duve vanu e vele
à u ventu ideale...

Di a to zitellina
cuntrastanu i moli
Batte u sciappittime
di a schjuma zergosa
Sghjumellanu i so canti
e sirene laziose
è tù posi pensosu...

In poppa i to sensi
a to vela si pesa
Sò l'isule quallà
chì si sveglianu, trè
Voca u to vascellu
à sculinà paesi
Sì capitanu è rè.

L'infinitu palesu
al dilà di e terre
un ragiu si ne more
ti fughjenu e sarre
Hè solu acqua in bullore
scritta in l'eterna stesa
a to storia d'amore.

U mondu , u mare , l'altrò
Duve vanu e vele....

Maestru Caravaggio

Ti piacìa u bughju
di e taverne tetre
dov'è ogni muscu gosu
ti purghjia una fiura
Quantu fù generosa
a vita in chjaru è scuru...

Fù riveritu l'omu
è celebrata l'arte
da tanti preputenti
è st'epica fù toia
Trà u lussu è u lozzu
fattu n'ai a prova
ch'un pò esse a luce
senza l'oscurità.

Ribomba un innu novu
trà ricciuli è curone
U calice hè surgente Maestru
in u to cantu.

I guaglini fangosi
ti porsenu e donne
a frebba di i carrughji
i to più belli amanti
È ne festi una vergine
di Lena a puttana
Cum'è mughju di vita
l'offerta nudità.

Nantu à a tela d'oliu
a buriana s'hè rossa
In e stufe in e mosse
u tempu ci s'attonda
immaculatu è mondu.

In la tò voce

À l'ispensata tù
cum'è un scalu chì salva
è u respiru longu di l'alba
Una spiscia di lume in i to ochji balla

è l'orizzonte s'apre...

In a to voce sentu a carezza di u ventu...

À l'ispensata noi
pè fà bella a notte
à l'oru di u tramontu sciolta
Sò cheti i paesi à ghjace i destini
Si spendecanu l'ore
ci sò mure turchine

È issu noi m'avvinghje
U fiatu , u battime
Senza dopu nè prima
È issu noi m'avvinghje

In a to voce sentu a carezza di u ventu

A mo pazzia

Sò lochi quessi da duve vengu
orfani è persi ,sò lochi vani
da duve mughju eiu l'umanu ...

Sò lochi vechji d'avvene muti
dov'è si spechja l'anima

Sola oramai...

Sò lochi immensi di nebbie pagne
pianure immerse sottu à u ventu
lochi rivolta d' idea sciolta...

Sò lochi vechji d'avvene muti
dov'è si spechja l'anima

Lochi di pene orrende
Pè a ùo notte errente
Oramai

Sola oramai...

Scalu

Date mi i visi è i carrughji
date mi isse fantasime
chì filanu
senza retta nè fine

Date mi l'ochji tanti è i zitelli
date mi i cumpagni
è l'amichi à millaie
ch'o pigli appellamanu

Date mi isse vicende
battelloni pisii
di parte è di vultà
a so storia chì batte
di fanga è di fumaccia

Date mi e stagione ardente
è i vaghjimi folti
di e parolle nove

Date mi a ghjente
è date mi u cantu
u ribombu chì volta da i celi
U muscu d'ogni stonda sciolta
nantu à a pelle

Date mi isse vicende
di passighjate notte
di luce bianca è finta
torna una volta
torna una volta.....

In tantu

In tantu ch'ella sia l'ora
da sopra à e parolle tutte
ch'un emu dettu
ch'elli ciottinu in noi tutti i ghjorni
cum'è tante carezze

In tantu ch'ella sia l'ora
da sopra à i punenti tutti

ch'ùn emu lettu
ch'elle s'alzinu in noi tutte
e notte cum'è tante prumesse
intantu...

Passu à passu avà
scalza vò nantu à e cote
chì sonanu nere.

In tantu di truvà u veru
in fondu à issu mughju di noi
ch'emu strappatu di stintu è di zerga
u frombu turchinu mezu à tante timpeste

In tantu vogliu sta canzona
da i culori tepidogni ch'è n'emu ansciatu
un'aria linda chì ribomba
u versu ch'è no averemu sceltu
intantu...

sarà quessu u mo chjassu
avà
o di fele o di mele
quale hè chì sà ?
Sarà quessu u nostru cantu avà...
Quale hè chì sà ?

Passu à passu avà....

Amazunia

Oghje hè piantu u tempu di l'acqua
Hè di frombu quellu di a scorsa
Oghje hè brusta u tempu di u celu
è di cennera quellu di a sorte

Hè di lume a Sierra Smeralda
hè di frasca l'omu chì s'avvia
Ma l'idea d'avvene suspira
o furesta u nostru fiatu spira
cun tè Amazunia...

Amazunia Selva maestra.

Hè surgente a donna spugliata
armunia u corpu chì s'attonda
U so cantu hè d'immensità
ecu in fondu à l'umanità

Amazunia billicu è corpu
core è respiru d'una rivolta
Amazunia u mo rispechju
verde reame spiritu vechju.
Amazunia...

Tù sì l'oru ch'assuva a vita
fiume sacru da curà ferite
Quandu l'omu lagna è s'addispera
fermi tù cum'è l'unica spera
per noi Amazunia...

Solu celi

Move l'azzurru spustendu l'ombra
Di u mo sguardu si piglia l'onda
È ci sì tù cum'è un pezzu di tempu
rinaghju caldu duv'è ghjacenu venti

Ti vogliu dì e mani offerte
Cù e mo brame à core spartu
Da visticà i chjassi di u to sonnu
Sveglià mi cheta in l'ortu di u to sognu

Celi solu celi da nanzu à noi
Celi solu celi gonfii è prufondi ...

Di vene in fiume cum'è a piena
Stonda chì batte in u mo senu
Memoria intinta d'alba imbalsamata
Di mele sì è di sale impastatu

Sì a mo sete chì mai stancia
Un ragiu coltu à l'ora mansa
Scalu scunfine di u mo viaghju
Marosu è sole in bocca à l'aduchjata

Nantu à u filu di e to labre sole
U fiatu meiu.

Un nome

À collu u to fangottu
di miseria cusgitu
di issa terra ferita
ti lachi l'ortu
per impettà a vita
chì t'apre le so porte
s'è dumane t'invita
chì ne sarà a sorte ?

S'hà pigliatu a guerra
e rise è e canzone
s'hè pisiu u sole
svanitu u cantu
È ti lasci l'agnone
ti ferma solu un nome
da inventà d'altre fole...

Francà l'onde di u mare
senza sapè chì mondu
in u ballu di a ronda
i destini ùn sò pari
Sottu à chì celi novi
l'ore sbucinerai
chì chjassu sarà toiu
chì furtuna o chì guai ?

È sì scalatu quì
giuvanottu valente
à spone u to fangottu
di polvera è di stantu
pè truvà ci un agrottu
un core una surgente
l'amore cum'è un portu...

Ti ferma solu un nome, un esiliu, una spera
Pè a terra diletta duv'è tù ti ne vai...

Segni

Segni in e to mani aperte
cù a to voce in preghera
Segni d'oghje è segni d'eri
Segni in senu à u mondu

Segni da scioglie malanni
è a luce cum'è un spechju
Segni d'onda segni vechji
Segni di celi ribombu

Fonte di vita à la cunfine
sò i destini.

Segni d'oliu à a to fronte
cù u secretu à e labbre
Segni di l'isula madre
Segni di l'antica sponda

Segni in l'ochju di u tempu
u gestu si face ballu
Segni magia chì salda
pezzi à pezzi
a nostra stonda.

Fonte di vita à la cunfine
sò i destini.

U mondu in e to mani

À tè chì porti u mondu in e to mani
Pè i to sogni di granu è di pane
È u to sguardu d'acqua linda
dov'ellu rughje l'oceanu
Pè e to sperenze scarnite
è tutte e prumesse vane...

À tè u sale di a terra
à tè a pace
À tè a voce di l'umanu

À tè chì porti u nome di a to terra
Pè i to pezzi di storia à focu è ferru
A sete vechja chì s'appuppa
à una lacrima sfiatata
Pè l'orizzonte chì s'intuppa
à u to celu chì si caghja

Solu cunnosci a calcina, u sudore
l'ore spiumbate di e to notte in catalettu
u basgiu amaru d'un sole senza calore
a pena viva è u so morsu in u to pettu...

Surella

Anch'eu sò di quelle
in a notte chì vanu
à cunsumà e stelle
In l'isula sumiglia
u silenziu hè di rena
Cum'è l'oru à e labre
u ghjornu in a calata...

Anch'eu sò cum'è tè...

Insegna mi a luna
dov'è tù stai ascosa
è tessi mi una funa
U chjassu di e vite
hè di petra è di brusta
ma u tempu chì s'apre
hè d'azzurru stampatu.

Sì mossa, sì l'onda
Sì spechju, sì mondu
Sì terra è sponda
Sì solcu è stonda...

Mucanu e ferite
e partenze è l'addii
e prumesse sbandite
Da tè sbuccia u cantu
l'alba senza catene
cum'è raggiu di pace
in core à l'attrechjata.

Anch'eu sò cum'è tè ...

